

关于春雨的宋词

1.
对宿烟收，春禽静，飞雨时鸣高屋。墙头青玉旆，洗铅霜都尽，嫩梢相触。润逼琴丝，寒侵枕障，虫网吹黏帘竹。邮亭无人处，听檐声不断，困眠初熟。奈愁极顿惊，梦轻难记，自怜幽独。行人归意速。最先念、流潦妨车毂。怎奈向、兰成憔悴，卫玠清羸，等闲时、易伤心目。未怪平阳客，双泪落、笛中哀曲。况萧索、青芜国。红糝铺地，门外荆桃如菽。夜游共谁秉烛。——周邦彦《大酺·春雨》

2.
一夕轻雷落万丝，霁光浮瓦碧参差。有情芍药含春泪，无力蔷薇卧晓枝。
。——秦观《春日》

3.
土膏欲动雨频催，万草千花一饷开。舍后荒畦犹绿秀，邻家鞭笋过墙来。
。——范成大《春日田园杂兴》

4.
春雨细如尘，楼外柳丝黄湿。风约绣帘斜去，透窗纱寒碧。美人慵翦上元灯，弹泪倚瑶瑟。却上紫姑香火，问辽东消息。
——朱敦儒《好事近·春雨细如尘》

5.
春路雨添花，花动一山春色。行到小溪深处，有黄鹂千百。飞云当面化龙蛇，夭矫转空碧。醉卧古藤阴下，了不知南北。
——秦观《好事近·梦中作》

6.
一雨池塘水面平，淡磨明镜照檐楹。东风忽起垂杨舞，更作荷心万点声

。——刘放《雨后池上》

7.

一春略无十日晴，处处浮云将雨行。野田春水碧于镜，人影渡傍鸥不惊。
桃花嫣然出篱笑，似开未开最有情。茅茨烟暝客衣湿，破梦午鸡啼一声。
——汪藻《春日》

8.

花过雨，又是一番红素。燕子归来愁不语，旧巢无觅处。谁在玉关劳苦？
谁在玉楼歌舞？若使胡尘吹得去，东风侯万户。——李好古《谒金门·
花过雨》

9.

寸恨谁云短，绵绵岂易裁。半年眉绿未曾开。明月好风闲处，是人猜。
春雨消残冻，温风到冷灰。尊前一曲为谁哉。留取曲终一拍，待君来。
——苏轼《南歌子·感旧》

10.

世味年来薄似纱，谁令骑马客京华。小楼一夜听春雨，深巷明朝卖杏花。
矮纸斜行闲作草，晴窗细乳戏分茶。素衣莫起风尘叹，犹及清明可到家。
——陆游《临安春雨初霁》

11.

过尽一春雨，园林气少和。偶然扶柳栗，复尔坐盘陀。小草数行字，残
花一曲歌。公卿非傲汝，无奈爱闲何！——陆游《初夏幽居杂赋·过尽
一春雨》

12.

疏点空阶雨，长明古殿灯。庐山岑寂夜，我是定中僧。——陆游《春雨
·疏点空阶雨》

13.

夜雨连明春水生，娇云浓暖弄阴晴。帘虚日薄花竹静，时有乳鸠相对鸣。
——苏舜钦《初晴游沧浪亭》

14.

连天芳草雨漫漫，赢得鸥边野水宽。花欲尽时风扑起，柳绵无力护春寒。
。——葛天民《江上》

15.

花尽春犹冷，羁心只自惊。孤莺啼永昼，细雨湿高城。扰扰成何事，悠悠送此生。蛛丝闪夕霁，随处有诗情。——陈与义《春雨》

16.

古木阴中系短篷，杖藜扶我过桥东。沾衣欲湿杏花雨，吹面不寒杨柳风。
。——志南《绝句》

17.

二月巴陵日日风，春寒未了怯园公。海棠不惜胭脂色，独立蒙蒙细雨中。
。——陈与义《春寒》

18.

苦雾藏春色，愁霖病物华。幽奇无可奈，强酌一杯霞。——王安石《春雨·苦雾藏春色》

19.

倚阑正尔受斜阳，细雨霏霏度野塘。本为柳枝留浅色，却教梅蕊洗幽香。
小沾蝶粉初何惜，暂涩莺声亦未妨。造物无心宁遍物，凭谁闲与问东皇？——陆游《春雨·倚阑正尔受斜阳》

20.

春雨如毛又似埃，云开还合合还开。怪来春晚寒如许，无赖桐花领取来。
。——杨万里《春雨不止二首·春雨如毛又似埃》

21.

春鸠鸣野树，细雨入池塘。潭上花微落，溪边草更长。梳风白鹭起，拂水彩鸳翔。
最羨归飞燕，年年在故乡。——李德裕《忆春雨》

22.

莺初解语。最是一年春好处。微雨如酥。草色遥看近却无。休辞醉倒。花不看开人易老。莫待春回。颠倒红英间绿苔。——苏轼《减字木兰花》

23.

冬旱土不膏，爰此春夜雨。四郊农事兴，老稚迭歌舞。相呼长沮耕，分喜樊迟圃。丰年已在目，亭障静桴鼓。我归未有期，一官寄仓庾。幸复宽简书，不敢恨羁旅。——陆游《春雨·冬旱土不膏》

24.

药炉茶灶淡生涯，听雨犹能惜物华。蘸岸顿添三尺水，沾泥不贷一城花。闲摩病眼开书卷，时傍危栏弄钓车。稚子孤行八千里，喜闻炊熟可还家。——陆游《春雨·药炉茶灶淡生涯》

25.

东风吹雨苦生寒，慳涩春光不放宽。万紫千红浑未见，闲愁先占许多般。——朱淑真《春雨》

26.

雨打江南树。一夜花开无数。绿叶渐成阴，下有游人归路。与君相逢处。不道春将暮。把酒祝东风，且莫恁、匆匆去。——王安石《伤春怨·雨打江南树》

27.

城云如梦柳恹恹，野水横来强满池。九十日春浑得雨，故应留润作花时。——王安石《春雨·城云如梦柳恹恹》

28.

为向东坡传语。人在玉堂深处。别后有谁来，雪压小桥无路。归去。归去。江上一犁春雨。——苏轼《如梦令·有寄》

29.

春风吹雨绕残枝，落花无可飞。小池寒绿欲生漪，雨晴还日西。帘半卷，燕双归。讳愁无奈眉。翻身整顿着残棋，沉吟应劫迟。——秦观《阮

郎归·春风吹雨绕残枝》

30.

丝丝杨柳丝丝雨。春在溟濛处。楼儿忒小不藏愁。几度和云飞去、觅归舟。天怜客子乡关远。借与花消遣。海棠红近绿阑干。才卷朱帘却又、晚风寒。——蒋捷《虞美人·梳楼》

31.

一自春来二月强，连宵甘霖泽斯滂。润留根蒂梅桃实，清及萌芽黍稷香。雀舌纤纤抽茗叶，羊群戢戢长松秧。农桑从此无虚日，纤妇耕夫处处忙。——卫宗武《春雨·一自春来二月强》

32.

三月七日，沙湖道中遇雨，雨具先去，同行皆狼狈，余独不觉。已而遂晴，故作此词。莫听穿林打叶声，何妨吟啸且徐行。竹杖芒鞋轻胜马，谁怕？一蓑烟雨任平生。料峭春风吹酒醒，微冷，山头斜照却相迎。回首向来萧瑟处，归去，也无风雨也无晴。——苏轼《定风波·莫听穿林打叶声》

33.

雨霁风光，春分天气，千花百卉争明媚。画梁新燕一双双，玉笼鹦鹉愁孤睡。薜荔依墙，莓苔满地，青楼几处歌声丽。蓦然旧事上心来，无言敛皱眉山翠。——欧阳修《踏莎行》

34.

春未老，风细柳斜斜。试上超然台上看，半壕春水一城花。烟雨暗千家。寒食后，酒醒却咨嗟。休对故人思故国，且将新火试新茶。诗酒趁年华。——苏轼《望江南·超然台作》

35.

春阴垂野草青青，时有幽花一树明。晚泊孤舟古祠下，满川风雨看潮生。——苏舜钦《淮中晚泊犊头》

36.

春雨春风，问谁染就江南草。燕娇莺巧。只是参军老。今古红尘，愁了人多少。尊前好。缓歌低笑。醉向花间倒。——朱敦儒《点绛唇·春雨春风》

37.

双飞燕子几时回？夹岸桃花蘸水开。春雨断桥人不度，小舟撑出柳阴来。——徐俯《春游湖》

38.

胸懷阮步兵，诗句谢宣城。今夕俱参透，焚香听雨声。——陆游《春雨·胸懷阮步兵》

39.

散乱萦花坞，空蒙暗柳堤。望回肠已断，何处更莺啼。——寇准《春雨·散乱萦花坞》

40.

小雨纤纤风细细，万家杨柳青烟里。恋树湿花飞不起，愁无比，和春付与东流水。九十光阴能有几？金龟解尽留无计。寄语东阳沽酒市，拚一醉，而今乐事他年泪。——朱服《渔家傲》

41.

十年此袂与君分，一笑楼头日过晨。真个愁来真似梦，不因诗到不知春。云霄元似非关我，风雨何须故恼人。犹得吟边慰怀抱，绝知膏馥乞诸邻。——袁说友《和杨诚斋春雨》

42.

无计柰何春日长，宰予介绍谒羲皇。蚁缿问阵天又雨，蜂欲舂粮花政香。——杨万里《春雨不止二首·无计柰何春日长》

43.

做冷欺花，将烟困柳，千里偷催春暮。尽日冥迷，愁里欲飞还住。惊粉重、蝶宿西园，喜泥润、燕归南浦。最妨它、佳约风流，钿车不到杜陵路。沉沉江上望极，还被春潮晚急，难寻官渡。隐约遥峰，和泪谢娘眉

妩。临断岸、新绿生时，是落红、带愁流处。记当日、门掩梨花，剪灯深夜语。——史达祖《绮罗香·咏春雨》

本文链接：<https://duanjuziku.com/duanjuzi/cej5sbkoe.html>